


# Ta'utino pe faafiti: o le tau e totogi i le tautuaina o le upu

Saunia e Levi Tavita

Tesema 2018



E ono vaeluaina le lalolagi i ni vasega se lua: o le tasi itu e ta'utino ma le isi e faafiti. O le tasi fai mai e leai se faamaoni i le mataupu i le suiga o le tau. O lana perofeta aupito ta'uta'ua o le peresitene o le malo Amerika, Donald J. Trump.

E ta'u le vaega lenei o le aufaafiti, latou te faafitia le moni o mea e tutupu. Ma ua iloa nei e leai se siamupini e tusa ma Trump i lea faiva. Ui i le falute ma faula'i molimau o su'esu'ega a le aupopoto i le tau, ae le suia ai lona fingalo.

E manino e pei o le ao le pogai o lenei faatalatu, e afaina ai lona 'oa ma le tamaoaiga. Auā e fesoota'i le 'oa a le to'atasi i le 'oa a isi mauoa, le 'oa a se nuu ma le 'oa a le lalolagi.

Mo nisi e pei o Trump e taua le gaosiga o le 'oa i lo le 'ea mamā; e tatau ai ona ola faasoloatoa afi o fale gaosimea. E taua le ola o pisinisi auā e faateleina ai le 'oa ma saga manuia ai se mau'oa e pei o ia.

I le isi 50 tausaga, pe a le toe iai Trump, e iloa ai pe ni a fa a lana molimau, i ni foliga o lenei paneta e tula'i mai. Talu ai o le uiga faale tagata, se'i iloga lava e vaai atu ua pa'u ifo le taualuga ona faato'a talitonu lea, ae le toe aoga, ua tuai.

Fai mai le molimau a e popoto i gagana, e tasi se gagana e leiloa i se lua vaiaso, mai le 7000 gagana a le lalolagi o loo faaaogaina. E mautinoa o gagana laiti e sili ona lamatia. E iai na a tagata Esikimo, o nisi pe na o ni tagata matutua e le atoa se 10. A maluu le tasi ua faaopoopo le popole. Auā a uma atu latou ona le toe iai lea.

I se tasi lipoti mai Amerika i Saute, se nuu i le Amasone toe to'atasi se alii o loo nofo ai. O loo taumafai le ausu'esu'e e faamau lana gagana i faailoga mata'itusi ma mea pu'eleo. O le faamoemoe ia taofia mo e lua. Atonu e alu aso sau aso e toe lagaina a'e ma faaaoga. Pe leai foi.

E iai le aufaafiti gagana fai mai e leai se aoga o gagana laiti i se si'omaga e pulea e le Igilisi poo se isi gagana malosi. E le afaina ia i latou le mate o se gagana, o se mea lelei lea mo le atina'e manuia o tagata.

Fai mai se taofi ua leva, e mafua le mativa ma ma'i faalenuu ona o le le fesoota'i i se gagana se tasi. Na mafua ai ona faamalositia tagata Aferika Amerika e lafoa'i a latou gagana, ae sagai ane e a'o le Igilisi, le gagana a o latou matai papalagi.

Ua leva ona feganavai tagata Aferika Amerika i le gagana Peretania ae le o suia ai so latou tulaga e pei ona valoia. E faapena foi i uso a Polenisia e pei o Maori, Hawaii, ma isi o loo taomia i pulega a papalagi, ui ina tautatala i le gagana a e pule, ae le o suia ai so latou lelei. E faamaonia le molimau, e iai le sootaga o se gagana

ma le tamaliiaga o se tagata. E te iloa oe i lau lava gagana. E iloa mai foi oe e isi ina ua e saunoa atu i lau gagana.

E tu mai i le mafaufau le ata ta'uta'ua o le na iloa i lana gagana, Peteru le soo o le Alii, e mafua ai le upu. Na iloa e le teine i lona si'uleo o se Kalilaia. O Peteru o le faaa'oa'o sili i le tagata e ta'utino toe faafiti.

Talanoa i ta'utinoga ta'uta'ua a le aufaatuatua, e sili Peteru i lana, "O oe o le Alo o le Atua Soifua." Ae lei utuva ae faafiti, "Ou te le iloa lenei tagata. ."

Ina ua fesili le ausoo i le Alii pe faape'i aga o le oo mai o le iuga o le lalolagi, na tali Iesu, e faapei o ona po o Noa. E moni lava upu a le Alii auā o lea ua tatou molimau ma vaai tino i ai. O le tasi faailoga o le faafiti. Faapei o Peteru, e fai ma le iloa ona o se uiga 'ailililo.

Peteru e mafua i le pala'ai, o isi o le 'oa, le mamalu ma le pule. Ua iloa le afaina ae le popole i ai, pe faapea foi ua pogisa le vaai ona ua faasili le tau i loo tausili i ai. E iai ona lolo'u le mea tonu. Na amata le tausaga i le maliliu o ni tama a'oga a Massey High, o se faalavelave e talitonu sa le tatau ona tupu, pe ana faatino tiute i le mea e gata ai. A ua a'oina mai ai ni lesona aoga ina ua ta'utino le lape o faaiuga.

Tula'i mai le malo fou ma ana fuafuaga mo Niu Sila, e iai faiga faavae e tali atu ai i faiga faavae tuai sa faataoto e le malo talu ai. Aemaise aafiaga o a'oga ma le aufaigaluega ona o atagalue faamaketi. Lenei ua faaiu le tausaga i le solo tete'e a faia'oga, ma le mataupu i le saogalemu o faia'oga a o fai lo latou tiute. Ua ta'utino le malo i le tulaga taufaasoaso ae manatu iuni o loo lava tupe e fai ai.

Talanoa atili i le faatatau o upu, e le mafai e le tagata malos i ona faapea mai ua ou sese. E le oo i ai lona malos.

A ua tatou iloa foi e leai se suiga lelei pe a aunoa ma se na lagona o le sese. E leai se faamagaloga e aunoa ma se na lagona o le atoatoa. Soo se suiga i le faaleleiga o se galuega e mafai pe a faailoa le faaletonu, ona fai lea i ai se galuega faalelei.

E faapea foi se suiga i lou ma lo'u tagata tauatia'e, e amata i le faapea ifo ou te mana'omia le suiga. A ia maua le lototele e faapea ifo ai, e mana'omia sea suiga mo a'u. Sea lototele e ta'utino le mea moni tainane e tau i ai i le gafa, le lotu, le malo, le faalapotopotoga, sou totino.

E fiafia ta'ita'i o malo malolosi e faasino lima i isi, ae musu e ta'u sona faaletonu. Tula'i mai ai se lalolagi o upufai i ta'utinoga pepelo ma feagaiga o faafitiga. Ua tatou molimau i le tau e totogi pe a tu atu se tasi e lu'i le pepelo ma le aga faafiti. E ta'utino le maliu o Jamal Khashoggi, ma isi tusitala, ma isi faia'oga, atoa ma fanau e to'atele.

Ae faamafanafana mai le tusitala o loane i lenei vaitau o le Pepe. E ese le folasaga a loane mai isi i lona ta'utino maua'i o le tulaga paia o le Alii, ma lona sooina i le uiga faaEperu o le Atua Foaofoa e fetalai (upu) e avea ma poto (Eleni) e sailia ma faamalamalamaina ai le lalolagi. Lenei e le vale sa tatou tautua i le upu pe a mautinoa lona afuaga—e mai le Atua lava. O ia o le Upu na liutino. E taua ai lo tatou faiva o ni auauna i le upu Samoa. E naunau ai e fai i le moni ma le loto maulalo.

O le tatalo o le Kerisimasi ia musuia o tatou ta'ita'i—i le malo, le lotu, nuu ma faapotopotoga, ia avea ma ni e ta'utino le moni ma le faamaoni, e le faafiti i le valaau a le Matai e faia le alofa ma lana amiotonu, aemaise mo e o loo sili le afaina i le faasoa a le olaga.

I le tusi pese Samoa le upu, ia le toe ai se faafiti, i le o loo valaau mai, tula'i ia ave le tala, ua maua e oe ia Iesu. O Paulo e ana le upu i le malosi o i le vaivai. Pe faapea foi, O le faafiti o le mea a le agaga vaivai, na o e malolosi e fai atu, ua ou sese.

O le ta'utinoga sili lea, e pei o la Peteru ina ua vivini moa e ta'u mai lona sese, ona tagi lotulotu lea, molimau le Tusi Paia.

La lea mo e ua ta'utino faamaoni, e le toe iai se faafiti i le  
valaau a le Matai.